

**Uunga siunnersuut: Suliffeerunnermi ikiorsiissutit pillugit Inatsisartut inatsisaat nr. xx,  
xx 2014-imeersoq**

(Inuussutissarsiornermut Aatsitassarsiornermullu Naalakkersuisoq)

**pillugu**

**Inuussutissarsiornermut Ataatsimiititaliap**

**ISUMALIUTISSIISUTAA**

**Siunnersuutip aappassaaneerneqarnerani saqqummiunneqartoq**

Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Knud Kristiansen (A) siulittaasoq  
Inatsisartunut ilaasortaq Ruth Heilmann (S) siulittaasup tullia  
Inatsisartunut ilaasortaq Karl Lyberth (S)  
Inatsisartunut ilaasortaq Andreas Uldum (D)  
Inatsisartunut ilaasortaq Aqqaluaq B. Egede (IA)

UPA2014-imi siullermeerinerup kingorna ataatsimiititaliap siunnersuut misissorpaa isumaliutigisanilu Inatsisartunut matumuuna saqqummiullugit.

**1. Siunnersuutip imaa siunertaalu**

Inatsimmi aalajangersakkat akornanni aammalu inatsisip kalaallisuuata danskisuuatalu akornanni naapertuuttoqarnissaa siunnersuutikkut qulakkeerneqarpoq. Siunnersuut suliffeqanngikkallarnermi ikiorsiissutit pillugit inatsisartut peqqussutaannik ulloq 1. juli 2006-imi atuutilersumik ataatsimut isigalugu ingerlateqqiineruvoq.

Inuit nammineq pisuussutigiginagu suliffissaaleqisut kiisalu sulisartut napparsimasut sulilluni iluanaarutissaraluanik annaasaqarnerminnut aningaasatigut pissarsisinaanissaannik qulakkeerunneqarnissaat inatsisissatut siunnersuummi suli siunertarineqarpoq.

Ikiorsiissutit sulisartunut sapaatip akunnerini kingullerni 13-ini akunnerni katillugit 182-ini sulisimasunut tunniunneqartarput, taakku ullormi suliffiusumi ataatsimi akunnernut 2,8-nut

naatsorsoqqillugit naapertuullutik. Taamaalilluni ikiorsiissutininik pissarsiaqassagaanni suliffeqarnermut killilimmik attuumassuteqarnissaq pisariaqarpoq.

Oqaasertanik iluarsinerup saniatigut suliffeerunnermi ikiorsiissutininik pisartagaqartoq piffissami ikiorsiissutininik pisartagaqarnermi nalaani ulluni ataasiakkaani akissarsiatigut isertitaqarsimaguni ikiorsiissutit piginnarnissaannut inatsisissatut siunnersuutikkut maanna pisinnaatitaavoq.

Aalajangersagaq pisortanit ikiorsiissutit pillugit Inatsisartut peqqussutaanni nr. 15, 20. november 2006-imeersumi aalajangersakkamut naapertuuppoq.

## **2. Siunnersuutip Inatsisartuni siullermeerneqarnera**

Inatsisissatut siunnersuutip piviusunnagortinneqarnissaa Inatsisartunit taparserneqarpoq. Inatsisartunit oqariartuut tamanna Inuussutissarsiornermut Ataatsimiititaliamit tusaatissatut tiguneqarpoq.

## **3. Tusarniaanermut akissutit**

Tusarniaaffigisat ilaasa tusarniaanermut akissutaanni allassimavoq inatsisissatut siunnersuut juullip ukiortaallu akornanni makkununga tusarniaassutigineqarsimasoq: Naalakkersuisut Siulittaasuata Naalakkersuisoqarfia, Aningaasaqarnermut Nunamullu Namminermt Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik, Ilaqutariinnermt Inatsisinillu Atortitsinermt Naalakkersuisoqarfik, Kommuneqarfik Sermersooq, Qeqqata kommunia, Qaasuitsup kommunia, Kujalleq kommune, Kanukoka, SIK, GA, Nusuka, Royal Greenland, Halibut, Deloitte, Polarseafood, Artic Prime Production aamma Arctic Green Food.

Siunnersuut Namminersorlutik Oqartussat tusarniaavianni tamanut aamma tusarniaassutigineqarpoq.

Tusarniaanermut akissutit makkunanit tiguneqarput: Ilaqutariinnermt Inatsisinillu Atortitsinermt Naalakkersuisoqarfik, Aningaasaqarnermt Nunamullu Namminermt Naalakkersuisoqarfik, Aalisarnermt, Piniarnermt Nunalerinermullu Naalakkersuisoqarfik, KANUKOKA, Kommune Kujalleq, Kommuneqarfik Sermersooq, GA, SIK, Piareersarfik Sisimiut, IMAK.

### **3.1. Ataatsimiititaliap tusarniaanermut oqaaseqaataa**

Piffissaq tusarniaaffiusoq siunnersuummut nalinginnaasumik nassuiaatini oqaatigineqarsimanngimmat naapertuutinningsutut ataatsimiititaliamit isigineqarpoq. Tusarniaanermi piffissamik naammaginarumik killiliisoqarsimanersoq inatsisiliortut

naliliinissamut periarfissaqarsinnaaqullugit taama isumaqartoqarpoq. Tusarniaanermut akissutit ilanngullugit nassiunneqartut malillugit inatsisissatut siunnersuut 2013-imi juullip ukiortaallu akornanni tusarniaassutigineqarsimasoq ataatsimiititaliap paasivaa.

Siunissami tusarniaanissani nalliuttut piffissallu sulinnigiffeqarfissat eqqumaffiginiarneqartassasut Inuussutissarsiornermut Ataatsimiititaliamit kaammattuutigineqarpoq, taamaalilluni pisuni taamaattuni piffissaq tusarniaaffiusoq sivitsorlugu illuatungeriit tusarniarfigisat, pingaartumik illuatungeriit tusarniarfigisat namminersortut tusarniaanermut akissuteqarnissaminni piffissaqarluarsinnaaqullugit.

Tusarniaaffigineqartut inatsisissatut siunnersuut ataatsimut isigalugu tapersersoraat ataatsimiititaliamit oqaatigineqassaaq. Taamatuttaaq tusarniaaffigineqartut kissaataat oqaaseqaataallu tunngavilersorluugaasut naleqquttumik annertussusilimmik Naalakkersuisut ilanngussimagaat ataatsimiititaliamit oqaatigineqassaaq.

#### **4. Ataatsimiititaliap siunnersuummik suliarinninnera**

Isumaliutissiissummi matumani siusinnerusukkut oqaatigineqareersutut siunnersuut Inatsisartunit annertuumik taperserreqartoq ataatsimiititaliamit oqaatigineqassaaq. Suliffeerunnermi ikiorsiissutinik pisartagaqartut naak piffissap ilaani taartaallutik suligaluarlutik ikiorsiissutinik pisartagaqaannarnissamut inatsisissatut siunnersuutikkut maanna periarfissinneqarmata ataatsimiititaliamit pitsaasutut isumaqarfigineqarpoq.

Innuttaasut amerlanerit suliffeqarnermut atassuteqaannarnissamut periarfissaqarnerulernerannik aalajangersagaq tamanna qulakkeerinneqataassasoq ataatsimiititaliaq isumaqarpoq, siunertaq ataatsimiititaliamit tamakkiisumik taperserreqarsinnaasoq. Naalakkersuisut ukiuni aggersuni suliffeqarnermut inatsimmik iluarsaaqqinnissartik naatsorsuutigigaat inatsisissatut siunnersuummut nalinginnaasumik nassuiaatini allassimavoq.

Isumaliutigisat Akileraartarneq Atugarissaarnerlu pillugit Isumalioqatigiissitap 2011-mi saqqummiussai suliassami tassani aamma ilanngunneqartariaqartut ataatsimiititaliaq isumaqarpoq. Sapinngisamik amerlanerpaat suliffeqarnermi eqeersimaartumik peqataanissaannik siuarsaasumik suliffeqarnermi eqeersimaartumik anguniagaqarnissamut iluaqutaasumik ilatsiinnartumik pilersorneqarnerup annikillisarneqarnissaata suliffeqarnermut tunngasutigut siunissami inatsisissani aallunneqartuarnissaa pingaaruteqartoq ataatsimiititaliaq isumaqarpoq.

**5. Siunnersuutip aningaasaqarnikkut kingunerisassai**

Siunnersuutip akuersissutigineqarnera aningaasaqarnikkut kinguneqassanngitsoq siunnersuummut nalinginnaasumik nassuiaatini oqaatigineqarpoq. Tunngavissat naapertorlugit ataatsimiititaliaq allatut naliliinissaminut tunngavissaqarsorinngilaq. Taamaalilluni Naalakkersuisut apeqqut tamanna sukumiisumik misissorsimassagaat aammalu malitsigisaanik aningaasaqarnikkut kinguneqassanngitsoq ataatsimiititaliamit tutsuigineqarpoq. Siunnersuut naatsorsuutigingisamik pisortat karsiisa annertunerusumik aningaasartuuteqarnerannik kinguneqassagaluarpit aningaasartuutit taakku aningaasaliissutaareersut iluini akilerneqarsinnaassapput, taamaattoqassappallu suliniutinik allanik tunulliussisoqartariaqassalluni.

**6. Ataatsimiititaliap inassuteqaataa**

**Ataatsimiititaliap isumaqatigiittup siunnersuut akuerineqassasoq inassutigaa.**

Taama oqaaseqarluni isumaliutissiisummilu oqaatigineqartut paasinnilluni ataatsimiititaliap siunnersuut aappasaaniigassanngortippaa.

Knud Kristiansen

Siulittaasoq

Ruth Heilmann

Siulittaasup tullia

Karl Lyberth

Andreas Uldum

Aqqaluaq B. Egede